

唐宋八大家散文总集

General Collection of Eight Great Literators' Essays
of the Tang and Song Dynasties

唐宋八大家散文总集

郭预衡 郭英德◎主编

河北出版传媒集团
河北人民出版社

苏轼
(四)

9
卷

9 卷

General Collection of Eight Great
Literators' Essays of the
Tang and Song Dynasties

唐宋八大家散文总集

新版校评 修订本

郭预衡 郭英德◎主编

苏轼

(四)

◎校评 史慕鸿
过常宝

河北出版传媒集团
河北人民出版社

司农少卿范子渊可知兖州

敕具官范子渊。朕于士大夫，未尝求备也，将历试以事，而收其所长。有司言汝治河无状，耗国劳民，积岁而功不成。朕惟水土之政，与郡县异，其观汝于牧民。尚勉求效，以盖往愆。可。

鲜于侁可太常少卿

敕具官鲜于侁。奉常之职，非特以治郊庙之度、服器之数而已，国有大政事、大议论，必稽焉。昔鲁秉周礼，齐不敢谋。而晏子太师折冲于樽俎之间。国之典常，君臣之名分，上下守之，有死不易，则国安而民服。朕选建卿士，付之礼乐，意在于此。非我老成之人，学足以通古，才足以御今，智足以应变，强足以守官，深于经术，达于人情，其孰宜之？《诗》不云乎。“彼己之子，邦之司直。”往修厥官，无教朕命。可。

范祖禹可著作郎

敕具官范祖禹。左右起居，东观著作，皆史事也。今左右史

独书已行之政，有司之常事。至于廊庙大议，君臣相与之际，所以兴坏治忽之由，一归于东观。则著作之任，顾不重欤？非得直亮多闻，古之所谓益友者，奋笔于其间，则善恶贸乱，后世无所考信。汝既任其事矣，益进而专之。朕苟有过，犹当直书，而况其余乎？往祇厥官，无旷乃职。可。

孙觉可给事中

敕。朕闻明主在上，凡侍从皆得言。若其不明，虽台谏亦失职。朕以冲眇，丕承祖宗。未堪多难之忧，常恐不闻其过。下至执艺，犹当尽规。岂必谏臣，而后论事。矧兹封驳之重，任参黄散之间。知无不言，职固当尔。具官孙觉，行不违道，言不违仁；处以孝闻，出以忠显。先帝所以遗朕，天下谓之正人。屡告嘉猷，固非小补；间自西省，迁之东台。而觉方进阳城之直词，固怀萧生之雅意。重违其请，阅月于兹。卒采群言，以遂前命。以尔抗章伏阁之志，施于还诏批敕之间。其一乃心，以称朕意。

范子渊知峡州

敕具官范子渊。汝以有限之财，兴必不可成之役，驱无辜之民，置之必死之地。横费之财，犹可以力补，而既死之民，不可以复生。此议者所以不汝置，而朕亦不得以赦原也。夷陵虽小，尚有民社。朕有愧于民，而于汝则厚矣。可。

王安石赠太傅

敕。朕式观古初，灼见天意。将有非常之大事，必生希世之异人。使其名高一时，学贯千载。智足以达其道，辩足以行其言。瑰玮之文，足以藻饰万物；卓绝之行，足以风动四方。用能于期岁之间，靡然变天下之俗。具官王安石，少学孔、孟，晚师瞿、聃。网罗六艺之遗文，断以己意；糠粃百家之陈迹，作新斯人。属熙宁之有为，冠群贤而首用。信任之笃，古今所无。方需功业之成，遽起山林之兴。浮云何有，脱屣如遗。屡争席于渔樵，不乱群于麋鹿。进退之美，雍容可观。朕方临御之初，衰疾罔极。乃眷三朝之老，邈在大江之南。究观规模，想见风采。岂谓告终之问，在予谅闇之中。胡不百年，为之一涕。于戏。死生用舍之际，孰能违天；赠赙哀荣之文，岂不在我。宠以师臣之位，蔚为儒者之光。庶几有知，服我休命。可。

张诚一责受左武卫将军分司南京

敕张诚一。孝治之极，天下顺之。不予之罚，民不轻犯。而贵近之间，尚有诚一。朕甚伤之。乃者奸言讹行，蠹国残民之状，论者纷然。方议其罪，而悖德隐恶，达于朕听，考实其状，至不忍言。《诗》不云乎：“行有死人，尚或殓之。”《礼》曰：“父没而不能读父之书，以为手泽存焉。”今汝之所为者，何为此极也。纵朕不问，汝亦何颜以处搢绅之列乎？可。

吕惠卿责授建宁军节度副 使本州安置不得签书公事

敕。元凶在位，民不奠居；司寇失刑，士有异论。稍正滔天之罪，永为垂世之规。具官吕惠卿，以斗筭之才，挟穿窬之智。谄事宰辅，同升庙堂。乐祸而贪功，好兵而喜杀。以聚敛为仁义，以法律为诗书。首建青苗，次行助役。均输之政，自同商贾；手实之祸，下及鸡豚。苟可蠹国以害民，率皆攘臂而称首。先皇帝求贤若不及，从善如转圜。始以帝尧之心，姑试伯鲧；终然孔子之圣，不信宰予。发其宿奸，谪之辅郡；尚疑改过，稍畀重权。复陈罔上之言，继有殪山之贬。反复教戒，恶心不悛；躁轻矫诬，德音犹在。始与知己，共为欺君。喜则摩足以相欢，怒则反目以相噬。连起大狱，发其私书。党与交攻，几半天下。奸赃狼藉，横被江东。至其复用之年，始倡西戎之隙。妄出新意，变乱旧章。力引狂生之谋，驯至永乐之祸。兴言及此，流涕何追。迨予践祚之初，首发安边之诏。假我号令，成汝诈谋。不图涣汗之文，止为款贼之具。迷国不道，从古罕闻。尚宽两观之诛，薄示三危之窜。国有常典，朕不敢私。可。

陈侗知陕州

敕陈侗。士临利害之际而不失故常者，鲜矣。以尔出入册府几二十年，安于分义，不妄附丽以干进取。死丧之威，兄弟孔怀，愿为一郡，以恤幼孤。朕甚嘉之。夫入为九卿贰，出为二千石，此亦搢绅之高选也。汝益勉之。可。

顾临直龙图阁河东 转运使唐义问河北转运副使

敕具官某。朕修赋役之法，黜聚敛之吏，去薄从忠，务以养民，而宽厚之弊，或至于偷。夫外台按事，以不失有罪为称职。若下有幸免之吏，则必有不幸之民。民困于吏，则归咎吾法。朕甚忧之。太原之民，困于边备，使者之任，不轻付与。以尔儒林之选，号称秀杰，有能吏之才而不薄，有长者之风而不偷。其服新职，以莅一道。敕唐义问云：赵魏之地，被边带河。使者之任，匪人可乎。以尔直谅之节，世其家声，岂弟之心，不忽民事。必能深识朕意，以肃吏靖民为本。往任其责，以宽吾忧。可。

苏颂刑部尚书

朕闻帝尧之世，伯夷以《三礼》折民；西汉之隆，仲舒以《春秋》决狱。是知有道之士，必以无讼为功。乃者法病于烦，官失其守。盗贼多有，狱市纷然。敷求迪哲之人，以清流弊之末。具官苏颂，温文而毅，直亮不回。仲由、冉求，果艺有从政之美；子产、叔向，爱直得古人之遗。遭罹闵凶，亦既祥禫。特诏虚位，以待老成。与其遂曾、闵之私哀，顾怀坟墓；曷若蹈威、绰之前轨，显扬君亲。伫闻嘉猷，以对休命。可。

赐正议大夫同知枢密院事安焘 乞退不允诏 元祐元年七月十三日

敕安焘。卿才当其位，义不辞劳。内之枢机之谋，外之疆场之议。既当身任其责，难以家事为辞。而况并奉君亲，两全忠孝。进无不得，退以何名。卿之所求，固非矫激。朕之不许，亦岂空文。亟还厥官，无烦再命。

刘谊知韶州

敕具官刘谊。汝昔为使者，亲见民病，尽言而不讳，厄穷而不悔，夫岂知有今日之报乎？孔子曰：“巧言令色，鲜矣仁。”夫能为朕牧养远民惠鲜鰥寡者，必刚毅不回之士也。往服厥官，益信汝言。可。

李之纯可集贤殿修撰河北都转运使

敕。乃者役钱贷息之弊，民兵马政之劳，萃于北方。而天不靖民，河溢为灾，老幼奔走，流离道路，十年于此矣。呜呼，其孰为朕劳来安集，使复其旧乎？以尔具官李之纯。治办之能，尝见于用。忠厚之质，不移于势。是用进登书殿，增重使指。其往抚疲瘵之俗，察贪暴之吏。无纵诡随，以谨无良。朕将酌民言以观汝政，可不勉欤？可。

明 堂 赦 文 元祐元年九月六日

门下。圣人之德，无以加孝；帝王之典，莫大承天。朕以眇眇之身，茕茕在疚。永惟置器之重，惕若临渊之深。承明继成，思有以迪先王之烈；绍志述事，未足以慰天下之心。仰系母慈，总揽政体。缉熙百度，和乐四方。赖帝颺临，海宇宁乂。三垂之兵靡警，万邦之年屡丰。庶几大同，光嗣成美。深惟六圣之制，必躬三岁之祠。惟兹肇禋，属予访落。丧有以权而从变，祭无以卑而废尊。顾言总章，古重宗祀，以教诸侯之孝，以得万国之心。我享维天，下武式文王之典；大孝严父，孔子谓周公其人。追惟先猷，尝讲兹礼。包举儒术，咨諏缙绅。刺六经放逸之文，斥众言淆乱之蔽。嘉与四海，灵承一天。革显庆之兼尊，隆永徽之专配。成于独断，畀予冲人。遵遗教于前，著成法于后。涓选吉日，哀辑上仪。奉壘琳宫，奠玉路寝。神之吊矣，燕及皇天；谁其配之，既右烈考。于时夙斋辂之驾，被衮冕之章。备庶物之微，追三牲之养。灵游而风马下，孝奏而日月光。惕然履霜，詎胜凄怆之意；僾然出户，如闻叹息之声。秩祜赉我思成，侍臣助予惻楚。既迄成于熙事，敢专飨于罔休。宣布洪恩，以暨诸夏。云云。于戏！汉庭祀帝，著于即阼之逾年；唐室施仁，固以御门之吉日。盖礼盛者文缛，泽大者流长。尚赖文武之英，屏翰之隽。协恭致治，以辅邦家。

皇帝达太皇太后贺大辽正旦书 元祐元年十月二日

肇易岁元，发新荣于万物；仰遵慈海，修旧好于两朝。远饬

使韶，肃将礼币。庶迎寿祉，式副愿言。

皇帝贺大辽皇帝正旦书 元祐元年十月

献岁发春，共讲三朝之庆。宝邻继好，茂膺五福之祥。申飭使车，往陈信币。永言欣颂，曷罄谕陈。

赵州赐大辽贺兴龙节大使茶药诏

敕。卿肃将庆币，远涉川途。风埃浩然，徒驭勤止。宜加宠锡，以示眷怀。

赵州赐大辽贺兴龙节副使 茶药诏 元祐元年十月六日

敕。卿将命夙兴，犯寒远涉。驾言未息，轸念殊深。特致恩颁，以嘉勤瘁。

雄州抚问大辽国贺兴龙节 使副口宣 元祐元年十月六日

有敕。卿等远犯风埃，久勤韶传。入疆兹始，授馆少安。申命抚存，式昭眷奖。

赵州赐大辽贺兴龙节人使
茶药口宣 元祐元年十月六日

有敕。卿等远饬使轺，来陈庆币。川涂甚阻，风雾可虞。特示至恩，往颁名剂。

赐正议大夫同知枢密院事安燾乞
外郡不许批答二首 元祐元年十月八日

一

览表具之。卿以应务之才，居本兵之地。绥静中外，人无间言。何疑上章，欲求去位。未喻厥意，闻之恍然。夫荣亲莫大于功名，养志不专于甘旨。而况魏阙之下，父母之邦。退食问安，孰便于此？勉循其旧，以卒辅予。

二 元祐元年十月八日

省表具之。夫事亲者，不择地而安之，孝之至也。而况艰难之际，一日万几。冰渊之惧，当务同济。卿练达兵要，灼知边情。寄托之深，义难引去。亟求自便，朕何赖焉。

赐南平王李乾德历日敕书 元祐元年十月八日

敕乾德。眷彼海隅，被予声教。宜有王正之赐，以为农事之

祥。勤恤远民，以开嗣岁。

赐皇叔祖建雄军节度观察留后同知大宗正
事宗景上表辞恩命不允诏 元祐元年十月九日

敕宗景。省所上表辞免恩命事，具悉。朕初执珪币，祇见上帝。嘉与百辟，徼福文考。大赉四海，始于亲贤。皆神之休，义不当避，国有常典，尔无固辞。

赐皇叔祖宗景上表辞恩命不许诏 元祐元年十月九日

敕宗景。览所上表辞免恩命事，具悉。国家有大祭祀，必均庆赏。邦甸侯卫，辉炮翟阍。无有远迹，毕蒙惠泽。矧我懿亲，实维显相。祇率旧典，毋须固辞。

赐正议大夫同知枢密院事安燾
乞退不允批答口宣 元祐元年十月十日

有敕。卿被遇先帝，勤劳有年。逮于眇躬，倚注弥重。宜安厥位，毋重力词。

赐新除检校太保依前河西军节度使
阿里骨加恩制告诏 元祐元年十月十五日

敕阿里骨。朕涓选灵辰，奉承宗祀。肆均介福，遍暨多方。

卿世抚侯封，夙虔朝命。特加宠渥，用奖忠嘉。

赐新除依前交趾郡王李乾德
加恩制告敕书 元祐元年十月十五日

敕乾德。朕躬执珪币，大飨帝亲。颁布湛恩，遍暨诸夏。卿世绥侯服，钦顺朝廷。宜锡徽章，以昭异数。

赐宰臣吕公著生日礼物口宣 元祐元年十月十六日

有敕。朕之元老，生以兹辰。实为邦国之华，岂独闺门之庆。故命尔息，往宣余怀。仍分厩库之良，以助子孙之寿。

赐新除依前光禄大夫刑部尚书
苏颂辞恩命不允诏 元祐元年十月十七日

敕苏颂。卿笃于仁心，深于经术。用心司寇，期于无刑。朕惟孝处之深，三年不夺其志。又推才难之故，千里以待其来。卿而不能，谁当能者。亟服乃事，毋烦力辞。苏颂表云：自循朽迈，敢冒优除。伏望收还成命，听服常僚。所有诰命，未敢祇受。

相州赐大辽国贺兴龙节使副御筵
口宣 元祐元年十月十八日

有敕。卿等远驰信币，来庆诞辰。眷言四牡之劳，宜享加筵。

之礼。式颁宠数，以示至恩。

赵州赐大辽贺正旦副使茶药诏 元祐元年十月十九日

敕。卿抗旌出境，凤驾在涂。眷言跋涉之劳，宜适兴居之节。式颁良剂，以辅至和。

赵州赐大使茶药诏 元祐元年十月十九日

敕。卿远飭使轺，讲修邻好。蒙犯风雾，跋履山川。宜颁锡于珍芳，庶辅安于寝食。

赵州赐大辽国贺太皇太后正旦
大使茶药诏 元祐元年十月十九日

敕。卿恭讲邻欢，远勤轺驭。言念驱驰之久，适丁寒沍之辰。宜锡珍良，式昭眷宠。

赵州赐副使茶药诏 元祐元年十月十九日

敕。卿远持使节，来庆春朝。方此沍寒，良勤启处。宜示眷怀之异，式颁剂和之良。

赐新除落致仕依前光禄大夫
范镇赴阙诏 元祐元年十月二十日

敕范镇。夫有德君子，以精神折冲。譬之麟凤，能服猛鸷。朕虚怀前席，以致诸老，非敢必以事诿也。苟得黄发之叟，幡然在位，则朝廷尊严，奸宄消伏。卿虽笃老，乃心王室。毋惮数舍之劳，以副中外之望。

赐镇江军节度使检校太傅开府仪同三司
上柱国康国公判大名府韩绛上表乞致仕
不许诏二首 元祐元年十月二十日

一

敕韩绛。览所上表陈乞致仕事，具悉。卿四世元老，国之长城。端笏垂绅，不动声气。风采所及，自然折冲。轩冕丘园，其实何异。矧今艰难之际，日有冰渊之虞。黄发在廷，未敢言病。岂宜独善，遽欲即安。尚分北顾之忧，勿起退归之念。强食自辅，体我至怀。

二 元祐元年十月二十日

敕韩绛。省所上表陈乞致仕事，具悉。功成身退，人臣之常。寿考康强，有不得谢。卿出入将相，垂三十年。岂以小郡，尚勤元老。徒得君重，卧护一方。使吏民瞻师尹之仪刑，蛮夷识汉相之风采。丘园之请，朕未欲闻。其省思虑，时寝食，亲近药

饵，以副中外之望。

赐金紫光禄大夫守尚书右仆射兼中书
侍郎吕公著生日诏 元祐元年十月二十七日

敕公著。卿将相三世，辅翼两朝。方《斯干》献梦之辰，有《既醉》太平之福。宜膺庆赉，永锡寿康。今赐卿生日羊酒米面等，具如别录，至可领也。

赵州赐大辽国贺太皇太后正旦
使副茶药口宣 元祐元年十月二十八日

有敕。卿等奉将邦币，驰会岁元。眷言凤驾之勤，方次中涂之馆。宜颁灵剂，以喻至怀。

赵州赐大辽国贺皇帝正旦使副
茶药口宣 元祐元年十月二十八日

有敕。卿等逖修邻好，方次州封。言念沍寒，想勤跋履。特颁名剂，以示眷怀。

赐外任臣寮历日诏敕书 元祐元年十月二十八日

敕韩绛。朕申命日官，逆推嗣岁。眷予共理，颁此成书。勉

劬农功，毋违时令。

皇帝为冬节奏告永裕陵神宗皇帝表本

伏以历纪天正，史书日至。感舒长于测景，增怵惕于履霜。恭惟谥号皇帝，德迈尧仁，功恢禹迹。游衣冠于原庙，徒仰威神；望松柏于桥山，永怀悲慕。

皇太后殿夫人为冬节往 永裕陵酌献神宗皇帝表本

伏以一阳来复，万物怀生。空临观祲之辰，无复称觞之庆。恭惟谥号皇帝，道齐覆载，德冒华夷。从南狩于苍梧，神游已邈；望西陵于铜雀，涕慕空深。

雄州白沟驿赐大辽贺正旦 人使御筵口宣 元祐元年十一月二日

有敕。卿等远驰使节，来庆春朝。属岁律之凝严，涉道涂之修阻。宜颁宴衍，以劳勤劬。

赐新除依前中大夫守中书侍郎吕大 防辞恩命不允诏 元祐元年十一月四日

敕大防。卿敦大直方，任重道远。擢贰西省，蔽自朕心。虽